

Ekspo APK wadah pelajar aplikasi teori keusahawanan

NET 9.11.13 11

AKTIVITI keusahawanan merupakan pemangkin kepada pertumbuhan ekonomi dan bina upaya terhadap masa depan negara. Justeru, golongan belia amat digalakkan untuk menceburi bidang berkenaan pada peringkat awal bagi menimba pengalaman dan ilmu yang secukupnya.

Universiti Malaysia Sabah (UMS) menyedari peri pentingnya bidang tersebut sekali gus mewajibkan pelajar pada peringkat prasiswazah mengambil kursus Asas Pembudayaan Keusahawanan (APK) yang bertujuan untuk menggalakkan aktiviti keusahawanan dalam kalangan siswa-siswi universiti.

Ia tidak terhad kepada pelajar jurusan Perniagaan sahaja, malah turut melibatkan pelajar jurusan lain seperti bidang Sains dan Sastera bagi memenuhi keperluan syarat ijazah. Kursus tersebut menganjurkan Ekspo APK yang memberi peluang kepada para pelajar untuk menjalankan perniagaan dengan menjual hasil keluaran mereka sendiri sebagai implementasi terhadap segala teori dalam asas keusahawanan yang dipelajari.

Bertemakan 'Make It Happen', Ekspo yang diadakan buat kali yang ke-9 ini bakal berlangsung pada 18-22 November 2013, bermula pukul 8.00 pagi hingga 5.00 petang, bertempat di perkarangan perpustakaan UMS.

Menurut Pengarah Ekspo berkenaan, Doo Ching Howe, tema itu diambil ke arah menggalakkan para pelajar untuk merealisasikan impian mereka dan tidak hanya sekadar angan-angan kosong.

Berikutan dengan usaha pihak pengurusan untuk menjadikan UMS sebagai universiti dalam taman atau Eko-Kampus katanya, ekspo kali ini juga membawa inspirasi kepada para pelajar untuk menghayati dan menghargai alam sekitar dengan aktiviti-aktiviti seperti kitar semula dan penyediaan 'mud ball'.

Tambah beliau, ekspo APK ke-9 kali ini juga agak menarik kerana dianjurkan oleh gabungan mahasiswa tahun 2 dalam pelbagai jurusan

kejuruteraan dari Sekolah Kejuruteraan dan Teknologi Maklumat (SKTM).

"Walaupun penganjuran pada kali ini diambil alih oleh para pelajar yang bukan daripada jurusan ekonomi, ia membuktikan bahawa siswa-siswi UMS mempunyai kemahiran serba boleh. Ekspo kali ini menjangkakan lebih 140 gerai yang akan dibuka melibatkan 1500 orang pelajar daripada jurusan Sains," katanya dalam satu kenyataan hari ini.

Sehubungan itu, orang ramai turut dijemput hadir bagi memeriahkan lagi ekspo berkenaan. Antara yang diniagakan termasuklah barangan kreatif hasil usahasama dan inovasi daripada mahasiswa UMS sendiri.